

《華嚴經普賢行願品》 補充講表

◎附表九（糅合《普賢行願品親聞記》、《普賢行願品隨聞記》）

○十方三世一切佛剎，極微塵一一中，各有不可說不可說佛剎，極微塵數廣大佛剎；

※《華嚴經普賢行願品疏鈔》卷第九云：「【一一各有不可說】等者，此中具有二種無

礙：一、一多無礙；二、小大無礙。所以然者，謂以性融相故爾。」

※《楞嚴經文句》卷二：「豈知大亦惟心，小亦惟心！惟心之大，大即法界，元無大相；

惟心之小，小亦法界，元無小相。」

※《大佛頂首楞嚴經》卷四云：「於一毛端，現寶王剎；坐微塵裏，轉大法輪。」

○一一剎中，念念有不可說不可說佛剎，……一切菩薩海會圍繞。

※《普賢行願品隨聞記》云：「念念之中即有如許成佛者，況經多劫。一剎尚然，況復多

剎，舉所請之境廣大無礙也。」

○而我悉以身口意業，種種方便，殷勤勸請，轉妙法輪。（糅合《普賢行願品親聞記》）

◆妙法即心法也，心法即正法也。如來說法四十九年，無非說的心法。轉正法輪者，說唯心之法，揀非心外取法也。為佛弟子不知有佛則已，知有佛即應請轉法輪。請轉法輪，即是上求下化，亦即是上順諸佛之心，下順眾生之心。佛以說法度生為本懷，然無請不說。故有人請法，自是上順佛心。眾生有欲求法而不知請，請則眾生得聞佛法故喜，即是下順眾生之心。對於佛法自有所知，願與眾生說，即是請自心佛說法。見他能說法者，請轉法輪，名字即佛以上之佛，皆當請之。是故有智慧人，一切時能修請轉法輪之行。會事歸理，皆請自心中佛說法，度自心中眾生。

※《普賢行願品隨聞記》云：「若知無不由現前一念而轉，則人心轉善，世界轉安。儒云：【一日克己復禮，天下歸仁】。妙輪不須向外著眼，只在當下一念，即能轉苦為樂，轉凡成聖。」

○復次，善男子！言請佛住世者。（糅合倭虛大師《普賢行願品隨聞記》）

◆請佛住世：請十方諸佛住世，以及請自性佛住世。

◆清涼云：「即是勸請中別義。」謂上勸請是請說妙法，以說法為主體。今請佛住世，以住世不入滅為主體；而住世者仍為說法度生也，或可即為說法，故請住世。以世尊為人天眼目，三界導師，閻冥慧日。若捨壽者，則世間眼滅，無所依怙；如人入暗，墮坑落塹，喪失身命矣，所以應勸請住世。

◆復次，佛者，覺義。一念迷，則佛入滅；一念覺，則佛出興。若常覺者，為請佛住世。

※《妙法蓮華經》又云：「然今實非滅度，而便唱言當取滅度。如來以是方便，教化眾生，所以者何？若佛久住於世，薄德之人，不種善根，貧窮下賤，貪著五欲，入於憶想妄見網中。若見如來常住不滅，便起憍恣；而懷厭怠，不能生難遭之想，恭敬之心。」是故如來雖不實滅，而言滅度，當知皆是諸佛善巧方便之力。

※《妙法蓮華經》云：「我雖說涅槃，是亦非真滅；諸法從本來，常自寂滅相。」

○所有盡法界、虛空界，十方三世：為欲利樂一切眾生。（糝合《普賢行願品親聞記》）

◆佛有六即佛。有欲涅槃者，皆請住世，莫入涅槃。一、理即佛：勸學佛法，令知自心即佛，即是請佛住世。不學無知，即是涅槃。二、名字即佛：已學佛法，雖知自心是佛，不修觀行，旋知旋迷，即是涅槃。勸修觀行，即是請佛住世。三、觀行即佛：十信菩薩，雖修觀行，不行六度萬行，未見自性，即是涅槃。勸修六度萬行，使見心性，即是請佛住世。四、相似即佛：三賢菩薩，雖修六度萬行，相似見性，不修加行，即是涅槃。勸修加行，轉似成真，即是請佛住世。故三賢位後，有四加行。五、分證即佛：登地菩薩，修證未圓，仍在涅槃。請彼圓修圓證，即是請佛住世。六、究竟即佛：不請住世，即示涅槃，故須請佛住世。以上六即佛，皆請住世。

◆又者各人智慧現前，即是佛住世；智慧不現前，即是佛涅槃。經文所請，究竟即佛也。

◆以有及諸聲聞緣覺，乃至一切諸善知識，我皆勸請，莫入涅槃句，故知六即佛，皆當勸請也。經劫句，請佛住世之時也。為欲利樂一切眾生句，是別明請佛住世之意。